

平定粵匪紀略

平定粵匪紀略附記一

春秋之義盜不書名漢史詳記意儆貫盈茲從班  
例明著典刑寒邪慝膽正天地經作賊名記第一

首逆洪秀全原籍廣東花縣生於嘉慶十七年壬申身  
癡肥略識字父國游與母均早死秀全飲博無賴以演  
命賣卜爲生先是廣東奸民朱九濤倡上帝會秀全及  
同邑之馮雲山踵師之後以秀全爲教主道光十六年  
偕雲山游廣西住桂平武宣二縣接壤之鵬化山中傳  
其教恐無術不足惑衆乃託名爲西洋天主教捏造天

父天兄名目造各妖書肆爲煽惑遠近不逞徒附之三十年六月自桂平縣之金田邨倡亂所過輒焚房舍絕安土望故脅從益衆初踞永安州僭僞號爲太平天國稱天王逼桂林撲長沙脅衆呼萬歲咸豐二年陷武昌順流下長江擄民船萬餘艘民男婦約五十萬人逆燄張甚自黃州下至安慶城悉陷三年二月初十日陷江甯城蔓延十六省陷城大小六百餘造宮室輿馬服飾封諸僞官僭王者制嘗受制於僞東王楊秀清閉令深藏號令一秀清出秀清死乃自由而兇蠢不能箝其下

同治三年五月二十七日大軍壁江甯城垂克仰藥死  
賊平懸重賞購得其尸髮禿鬚尙存皮肉有未潰者舉  
烈火焚之

洪福瑱逆秀全長子賊妻賴氏生初名天貴九歲時秀  
全好異作三字名呼爲天貴福秀全死羣賊擁立之爲  
重造僞璽名下橫列眞王二字人復誤名之爲洪福瑱  
時年僅十六歲六月十六日

王師拔金陵賊巢福瑱惶急僞忠王李秀成讓善馬使乘以  
逃由安徽之廣德往浙江湖州復出竄江西之廣昌匿

石城荒谷中爲游擊周家良搜獲疏聞

上以么騰小醜不值檻送京師卽在江西省城凌遲處死

洪大全湖南衡州人少應童子試狂悖敢大言亡命粵西與秀全聯宗誼入其黨僞號天德王性狠毒而外假仁義擄人時十則畱三禁無姦殺頑衆以爲賢楊逆秀清心思之在永安突圍出爲官軍擒而大全囚服繫鎖鐐受縛獻俘京師磔於市或曰秀清囚之而逸出被獲也或曰賊目敗竄徃徃着囚服冀倖脫近之

洪仁發仁達皆逆秀全兄與異母倡亂後附之楊逆惡

其手足親不令聞軍事每詭稱天父附體肆謾罵焉仁達嘗失律後至以爲大不敬當誅秀全令肉袒請罪不獲己予杖百仁達起欣欣以爲得天父憐他愚陋類此楊逆死僞封仁發安王仁達福王並用事惟食粟貪貨而已洪成春洪球琳未知與首逆親疏亦任之重常寇竄三河桐城間爲官兵誅死僞干王洪仁玕首逆同祖弟也楊韋諸賊相屠戮秀全懼太橫難制故僞封猶少及仁玕自粵西行乞至喜而王之恐無以服衆乃擇心腹賊悉僞加王號而逆宗靡不王矣其親於秀全者曰

和元曰利元曰葵元曰春元皆仁發輩子也同治三年四月江甯既合圍賊駭甚有欲通官軍爲獻城計者逆黨捕獲之秀全下其事仁發竟受賄銀數千置不問李秀成竄蘇杭時囑城賊各購米穀資口食而仁發輩令於衆非洪氏帖不得使粒米入金陵因以貨帖營利迨官兵合圍城中乏糧秀全團百草以食秀全以其兄爲可任而不知其愚至此仁發輩之愚其秀全之悖逆有以取之也克金陵仁發仁達皆就戮仁玕竄江西亦就擒又有僞卹王洪仁政亦爲秀全同祖兄與仁玕同誅

自首逆以下至逆宗之有名目者共十三人

次逆首楊秀清原籍廣東嘉應州遷居廣西桂平縣之大黃江世以種山燒炭爲業秀清獨無賴游蕩性好譎異恒情初名嗣龍秀全約爲兄弟改今名僞號正軍師東王一切軍事取決焉當攻永安時官軍勢盛賊窮蹙有散志獨秀清堅忍籠絡羣醜燼而復熾且恃詐力能鈴制其下秀全託名天主教捏造天父天兄名目秀清證其說自作巫謂天父下凡附其身屢託巫語叱令秀全前跪受杖使嚴憚之秀全踞江甯居督署閉令深藏



羣賊莫覩其面者數年秀清出則陳儀衛張旂幟鹵簿  
擬法駕而雜以傀儡戲室中琳瑯錦繡煥若天宮供頤  
指者狡童豔女以百千計貪慾無度損一目臥病以曾  
私洪逆妹爲蕭朝貴妻朝貴死蓄僞宮具章請治疾以  
善抑搔故洪逆勉從之其畏憚至此咸豐六年七月向  
大臣以疾薨城賊舉酒相慶秀清陰有自立意令其下  
呼萬歲賊黨有不從者密助洪逆召僞北王僞翼王歸  
賀韋昌輝先至詣秀清止而觴之酒酣抽刃以刺洞胸  
遂割烹以享其衆盡誅秀清族黨

逆魁蕭朝貴洪逆妹婿也廣西武宣人從洪楊二逆亡命以兇惡猛悍稱每率賊與官兵苦戰屢陷城屠戮極慘僞號又正軍師西王僞副軍師南王馮雲山廣東化縣人素與首逆習上帝會偕游廣西爲桂平令緝獲逆黨黃玉崑設計行賄兎脫方獄急時玉崑斂錢充用費相識者咸以燒炭爲業因按炭取資謂之科炭及僭據猶叙科炭功加僞職焉咸豐二年破全州將順流犯長沙官軍於下游襲衣渡伐木作堰力扼之鏖戰兩晝夜雲山斃於礮迨至長沙朝貴亦擊死賊均葬以僞王禮

爲我軍掘得磔其尸逆黨諱其死仍存僞西王南王號  
雲山無子朝貴子有和襲僞西王死亂兵中

韋昌輝原名正桂平縣人石達開原籍廣東和平縣住  
廣西貴縣家均富饒洪逆倡亂懼搜括莫保身家獻貲  
助賊故得僞號昌輝北王達開翼王二逆小有才爲洪  
秀全所親幸然均下秀清一等秀清啓事稱弟稱立二  
逆則稱臣稱跪陷江甯句當壹是羣賊先白昌輝達開  
謂之稟報二逆揣可行而轉達秀清則爲稟奏二逆諂  
事秀清實陰圖之及秀清欲呼萬歲昌輝自皖省回手

刃之達開後至賁其殲東黨太酷昌輝欲併圖之達開  
覺縋城夜遁昌輝悉誅其母妻子女洪逆怒令衆攻偽  
北王府昌輝渡江遁途遇東逆黨縛送族誅而達開遂  
孑然上竄分黨騷動川黔地同治二年四月爲川兵生  
擒凌遲死洪逆負嵎十餘年僞封諸賊王號以千百計  
而尊寵惟次首逆楊秀清一人逆魁四人

秦曰綱一名曰昌貴縣人曾充壯丁後黜革入上帝會  
與蕭朝貴均爲洪逆驍將朝貴死曰綱獨當一面楚以  
北尤著驍慙焉旋擾九江安慶諸屬邑官軍克復武漢

守賊石鳳魁退竄田家鎮將有他志曰綱馳救而密令楊逆收鳳魁之權尤爲洪逆心腹後逆魁相屠曰綱死亂刃中罪與蕭馮韋石埒雖比肩胡以眈而以眈視之不及也

胡以眈桂平人家素封就童子試不售好放言眩愚頑及見洪逆等妖書深相結羣逆常聚會其家入江甯僞號豫王報其爲煽亂時東道主也與諸逆竄擾江北踞廬州後亦走死

陳承銘逆倡亂時渠惡也爲秀全僞朝內官拜興國侯

改僞佐天侯楊韋逆倚任之惟出掠不如其同黨黃玉  
崑能黃玉崑者桂平人素以健訟魚肉鄉里道光末逆  
魁馮雲山以傳上帝會逮囹圄玉崑左右庇出之有美  
女石逆取妻焉犯長沙爲前隊官兵避其鋒咸豐三年  
二月江甯陷玉崑矯僞詔安民甚信於楊逆自僞侯以  
下無與抗禮者偶失逆首意予杖羞忿投水而羅苾芬  
遣救之羅苾芬者亦從亂渠惡也僞封地官又正丞相  
爲韋逆司會計韋逆行事能以意會常畱江甯城韋逆  
死苾芬坐同黨被誅

林鳳祥老賊也咸豐三年二月犯江甯鳳祥先登儀鳳門封僞侯與李開芳會立昌分陷鎮江揚州城又率賊渡河北擾山東直隸界五年正月官兵克連鎮鳳祥薙髮匿身地洞汙泥中搜獲檻送京師凌遲處死僞地官正丞相李開芳亦於是年四月擒於馮官屯伏誅會立昌踞揚州時爲僞指揮後北竄僞封丞相爲官兵驅溺曹縣黃河中

羅大綱廣東籍爲海盜以兇狡凌侮其儕輩見嫉於衆遂亡命潯梧間聞洪秀全亂走歸之其陷鎮江揚州從

林李逆往慄悍機警肆毒爲二逆冠數攻田家鎮焚劫  
罄盡備諸慘惡僞拜冬官正丞相才出諸僞王上無封  
號自恨非粵西賊比後爲水師礮擊沈尸於江

吉文元亦廣西老賊北竄伏誅又有羅亞旺范連德者  
倡亂時與胡以晄同封僞官後無聞疑已於永安時殲  
除矣

僞丞相何震川象州人爲諸生不獲倚恃才傲物憤激  
故甘從賊者賊中僞詔誥文檄出震川手而盧賢拔依  
倚附和之賢拔僞封掌朝儀同將軍凡賊中之天條三



字經僞書及官職制度皆賢拔草創上洪逆而令震川  
潤色之悖逆尤甚後無聞官軍勦賊營所獲文案率鄙  
俚可噴飯二賊不屠戮必嬰斧誅矣盧何二逆外有曾  
水源曾釗揚俱粵西賊訓蒙童於胡以晄家入江甯以  
撰僞書受職未嘗與軍事又皆二逆之卑視齷齪者  
朱錫琨在金田時僞封右軍長與僞前一軍拯危急將  
軍黃益芸少相善皆勇敢抗官軍殊死鬪咸豐三年四  
月賊衆北犯錫琨益芸行抵六合敗歸是年十月復與  
許宗揚竄山東爲林鳳祥應援宗揚亦狡健善戰在曹

縣時爲官軍擊逐三賊與同行之曾立昌均策馬赴黃河死

蒙得恩者性狡叵測善會人意逆踞江甯搜良家女充僞嬪嬙得恩輒密計誘獻之拜僞春官正丞相總理女營事各營僞女官及女巡查日三至聽令焉自逆魁相屠後洪逆最信任得恩僞封正掌率雖逆眷房闈所需物亦關白而行厭膏粱叢羅綺耳倦聲目眩色窮極奢慾逾十年後病厲以伏冥誅聞

林紹璋從逆首破岳州僞封監軍春官又副丞相咸豐

四年二月犯湘潭賊衆覆歿紹璋跳免伏湖口數年以  
僞忠王李秀成薦與李春發掌管賊朝事號僞章王出  
踞桐城爲安慶聲援官軍清皖省衆潰而死

曾天養貌兇惡趨捷善騎射賊中呼爲飛將軍屢陷城  
邑爲僞左檢點咸豐四年二月泝流犯湘潭破岳州回  
陷武昌與其族名錦兼名鳳傳者俱倡亂賊洪楊逆信  
任之授僞軍帥然二賊殘忍相上下鳳傳粗鄙畏縮不  
爲賊衆稱敗竄死而天養突鋒刃所過輒靡七月官兵  
大戰城陵磯擒天養梟其首重十餘斤其軀幹雄偉可

想又有曾天誥者天養弟兇威亞於兄羣呼曾七哥授  
僞殿前左二十七指揮天養伏誅於城陵磯天誥竄田  
家鎮守磨盤山遁去

陳桂堂亦倡亂賊守江甯朝陽門性譎詭頗洞事機會  
欲通官軍爲內應其黨有張瞎子者名子朋勇猛喜殺  
咸豐三年二月乘船犯湖北至廣州撻健兒多賊衆怒  
有投誠意桂堂駛達楊逆改遣唐正財賁金帛犒資撫  
慰賊歡如故杖子朋一千正財籍粵西幼習篙楫爲販  
商在岳州遇賊令司水營事甘心從逆與桂堂均僞職

丞相子朋坐閉錮數年亦僞號丞相韋賊復踞武漢僞  
檢點黃再興副僞國宗石鳳魁守之知鳳魁驕蹇不服  
衆乃潛竄田家鎮爲犄角勢密啓楊逆令桂堂代鳳魁  
桂堂將至而官軍收武漢克田家鎮楊逆以再興報遲  
積素憾殺之臨死尙嘆曰如桂堂早十日來武漢無虞  
矣唐正財後僞封航王守蘇州同治二年十月官軍克  
蘇州擊斃

吳如孝少爲洋商司出納敢死犯不墜富兒輩不知其  
才也輕之故從亂與羅大綱陷鎮江揚州封僞總制復

自領一軍攻東壩回踞鎮江城最久咸豐七年十一月官兵克鎮江如孝跳身出封偽顧王與偽英王陳玉成合兵由湯頭河進破官軍土橋營八年八月從陳玉成會捻首龔得樹由界牌下犯滁州又分踞桐舒等城九年八月在盱眙爲總兵張得勝陣斬之

白暉懷僞殿右十二指揮咸豐三年五月與賴漢英犯江西敗回又攻陷三汊河踞廬州四年二月上犯岳州城陵磯官兵擊走之爲楊逆誅賴漢英者洪逆之妻弟呼賴國舅犯江西轟城三次幾圯爲官兵堵截退兇猛

亞於羅大綱故喜與大綱俱後失楊逆意囚禁之其族  
子賴文鴻名埒漢英屢從陳玉成往來太湖宿松間與  
官兵抗壘積經年月大兵屢困江甯城文鴻偕李秀成  
陷杭州牽制之我軍克蘇州文鴻不知所終

林錫保胡海隆張朝爵殘忍好殺用非刑羅織人罪銜  
己聰明而博楊逆歡楊逆誅三賊皆其黨悉被戮

周勝坤業質庫與吳可億罄家貲助逆故皆僞封典聖  
庫凡獲財帛令勝坤可億守藏之而滕坤獨勇力敢戰  
咸豐四年帶賊目陳宗勝梁立太等犯皖屢抗官軍宗

勝爲僞丞相獨犯高瀆東壩敗往廬州援胡以晄遂久  
踞廬立太爲僞殿左二十三檢點甚見賞於石逆每出  
必偕又爲秦逆副擾建德東流颺閃無常從周勝坤輩  
以皖省爲老巢後均殲於皖

涂振興形若猿猱吉志元短小精悍目有兇光性俱喜  
殺戮志元年幼於振興而從逆最先入江甯授僞北殿  
僕射犯湘潭回犯黃陂孝感官兵追躡黃岡倉子埠殲  
誅於半壁山余廷璋亦同時殲斃於小池口性亦暴虐  
異常情封僞殿四十指揮振興爲僞殿左七承宣常援



鎮江佐陳玉成抗官軍敗走死

羅瓊樹其族兄曰大綱著名逆酋而瓊樹爲大綱策應  
屢陷江楚諸州邑僞授丞相職林啓容魏超成覃炳賢  
雖皆粵西賊寵任常出瓊樹下啓容初爲楊逆健兒入  
江甯尙未授僞職從賴漢英石祥貞犯江西封僞殿右  
十二檢點超成嗜殺人不可勝計擾興國武甯義甯諸  
州縣與僞御林侍衛殿左二十一檢點覃炳賢俱以殘  
暴冠其羣亦屢犯建德東流宿松太湖界當大綱張燧  
全楚時以瓊樹從聲勢聯絡我軍屢受其害微甯至武

漢小兒皆知有羅矮子者自秦曰綱以下惟羅逆兄弟等籍廣東餘皆粵西賊倡亂渠惡罪擢髮不勝數者計四十八人

稽古草竊僭名號者以其逆族爲國宗若僞王侯將相但尊焉寵焉戚里焉已耳舉從逆之子姓而盡國宗之可矜也楊秀清自黨屠伏天誅子姪無聞有楊輔清者竄閩浙騷擾邊界官軍副浦口輔清爲僞中軍主將解江甯圍封僞輔王再寇皖省官軍圍急絕其糧道賊盡斃輔清先遁以免云是秀清弟咸豐四五年間踞蘄州

者僞金二副將軍名明來亦其族是爲楊宗蕭朝貴子  
有和外又有名招生者抑亦其宗歟馮雲山早誅宗無  
聞其以僞國宗煽惑僞都及外竄踞城池者惟韋昌輝  
石達開二逆爲衆元玠韋昌輝父尊爲國宗伯逢禮拜  
日必書名跪請洪楊首逆安僞都大喜慶雖昌輝前亦  
跪稱千歲謬悖無人倫至此昌輝有兄曰濱早死有弟  
曰亞孫曰十一咸豐元年八月向大臣破風門劫斃之  
四年克太平府檣斃韋得玲稱僞國宗不知爲昌輝何  
人石達開之宗有祥貞鎮嵩鳳魁皆僞名國宗居廣宅

擁婦女飲酒食肉車馬儀從與洪逆宗無別不加職以  
事隨攝之自鳳魁失武漢與黃再興同誅惟祥貞略有  
作賊才其遣在亦重陷常德復陷岳州武昌皆祥貞總  
僞兵務半壁山之捷鎮崙授首祥貞亦殲於七磯洪又  
有名達德者亦達開弟兄咸豐十年四月廣西百色廳  
陣斬之計僞國宗四姓共十三人

古之尙嬖倖久矣女寵之外有男色焉至若厨豎寵養  
亦賤伎屬也執途人而奉以爲若韓嫣若董賢若續貂  
之中郎將爛頭侯爛胃尉鮮弗勃然怒罵者蓋稍具廉

恥羞比之而况逆黨媒狎哉黃啓芳貌美麗自喜初爲  
韋逆教讀諸逆皆嬖焉封僞恩賞丞相掌封僞官職頒  
執照實福壽有奇思少習審曲工至江甯爲逆構洞房  
密闥宮觀綿麗極鬼巧亦僞封恩賞丞相凡未專攻掠  
以技藝進者皆授斯職焉逆之掌機織者鍾芳禮充內  
鑒者何潮元李俊良率以便辟巧媚侍諸逆左右供役  
使其才貌兼優出入簾幕爲閤井害凌侮良家者則李  
壽暉李壽春侯謙芳侯裕寬四人裕寬貌尤妍若美婦  
人妻充楊逆婢媵身亦爲掌庖兄侯淑錢亦推恩僞恩

賞丞相謙芳有心計通文墨楊逆機密事必與議權勢  
傾韋石壽春亦然僞侯相均造廬與居是又不僅以僞  
恩賞丞相著者僞恩賞丞相亦間爲尤職候遷擢者暫  
領之如記中徒書僞丞相者是茲擇其尤者錄之

奮螳螂之斧者不可當隆車之衝勢有必靡也錄賊之  
生擒伏顯戮者倡亂初小醜跳梁無名目可指咸豐二  
年冬僞軍帥劉勝芳圍湖南衡州斃於礮三年三月攻  
金陵擒僞總制陳轉樹割之五月僞殿右八檢點汪成  
林殲於江西僞春官又正丞相曾錫發殲於揚州三汊

河四年春焚僞副丞相陳世保於山東冠縣逼溺僞丞相曾立昌許宗揚於曹縣河中七月楚軍攻天門擒首逆孔昭文刺死僞丞相汪得勝於湖南岳州之城陵磯閏七月攻江南克復太平府擒斃僞檢點陳贊元僞將軍李長有僞總制吳春和八月湘軍克復武漢俘僞殿前丞相孟文慰於金沙洲戮之崇陽縣擒斬僞丞相金之亨臨淮軍陣斬逆首吳鳳珠九月安徽廬江縣生擒僞監軍任大綱十月楚軍水師破田家鎮之半壁山及江西軍攻武甯義甯殲擒僞殿左四十九指揮梁修仁

僞土八副將軍黃鳳歧僞將軍陳文金僞提督韋以德  
僞炎三總制劉紹武僞西貴親陸鍊福湘軍之攻九江  
克湖口也擒僞將軍梁國安僞總制熊常易僞司馬許  
學受是月揚州軍斬僞秋官又副丞相鍾廷元楚軍攻  
崇陽縣興國州殲斃僞總制廖敬順僞育才官胡萬智  
僞檢點萬象汾五年四月北軍克馮官屯擒李開芳時  
有黃懿端謝金生等八名皆僞官悍黨解京戮之是月  
江南水師擒僞先鋒陳長順湖北陸軍擒僞總制伍大  
貴僞丞相陳大爲十一月金陵斬僞丞相周少魁揚州



擒僞參護鄭金桂十二月江南水師擒僞檢點趙元發  
僞將軍王化興六年冬江西擒僞將軍羅文元僞司馬  
李光發九江焚賊船擒僞檢點古文新楚軍攻黃州戮  
僞將軍章成金劉松稠七年二月安徽壽州斬僞將軍  
吳守剛先鋒楊得應張定邦九月於巢湖中生擒僞指  
揮陳上林八年二月楚軍於羅田縣之黃泥畝擒劇賊  
僞丞相韋朝綱四月克九江逆酋僞貞天侯林啓榮僞  
元戎李興隆死於亂軍中八月楚南援軍攻江西吉安  
府甚急城賊內亂自殺僞丞相翟明海其僞先鋒李雅

鳳僞副將軍吳法爲我軍所擒九年二月江南江浦縣  
生擒僞固天福洪方僞立天豫莫興是年賊中添僞銜  
於王侯之下有義安福豫燕五等洪方等是已七月石  
達開率大股圍攻湖南寶慶府陣斬僞元帥胡德孝僞  
統戎陳麗江僞佐旂總制黃立英生擒僞檢點陳明官  
僞將軍蔡光遠周學福王智明李定發僞提審孫子安  
僞通傳許六祥時石逆與洪逆已若合若離故僞官如  
元帥統戎佐旂提審通傳等名與金陵異矣八月楚軍  
攻安徽石牌越濠縱火生擒僞總制霍天燕石廷玉十

年正月克太湖擒藍承宣爲僞銜非其名也是月廣東連山廳亦擒僞先鋒范亞侗皖南斬僞岡天燕賴汶禾三月安徽績溪縣擒僞企天侯鄧傳意六月黟縣陣斬僞丞相吳桂先十一年二月江蘇青浦縣民團殺僞師帥劉蘭升四月福建軍斬僞師帥鍾觀海五月楚軍克安慶城外之赤岡嶺賊壘斬首逆劉瑋林李四福十月克隨州首逆馬清太死亂軍中同治元年楚皖軍克廬州擒僞導王陳仕榮僞從王陳德隆僞統天義陳聚成僞天軍主將向士才僞虔天義陳安成僞禱天義梁顯

新皆四眼狗陳玉成死黨故陳姓爲多四月浙江軍克復台州府仙居黃巖等縣擒僞延天義李元徠僞王李洪藻李遇茂僞主將李尙揚僞佐將鄧積仕十一月江蘇福山賊目駱國忠投誠誘殺僞憑天義錢加仁二年二月復擒僞孝天義朱衣點是月四川擊斃僞中旂賴裕新卽賴剝皮石逆達開之前鋒也三月江蘇太倉州擒斬僞會王蔡元濫江西斬僞祐王李遠繼僞孝王胡昇文僞絢天義古文義四月安徽六安州斬僞富天豫張承德七月江蘇軍克浙江之西塘鎮戮僞王宗廖姓

僞羅天安施得桂僞敬天福汪敬之僞鐙天侯曹盛勇  
八月攻無錫僞祥王黃隆芸溺斃十月攻蘇州擒僞天  
將萬國鎮是月克復省城戮僞慕王譚紹洸僞納王邵  
永寬僞比王伍貴文僞康王汪安鈞僞甯王周文嘉僞  
天將范啓發張大州僞將軍汪懷武汪有爲十一月續  
克無錫擒僞潮王黃子澄同時浙江軍在杭州擊斃僞  
歸王鄧光明三年克江南句容縣擒僞翰王項大英僞  
列王方成宗蘇州軍於金壇縣陣斬僞直王林得英僞  
林天安黃有才是月江西亦擊斃僞天將林正揚僞倍

天侯張在朋四月蘇州軍攻克常州生擒僞護王陳坤  
書僞佐王黃和錦是月克丹陽擒僞來王賴桂芳僞烈  
王陳時永五月擒僞威王陳榮於浙江之孝豐縣七月  
楚軍擊斃僞天將蔣開揚於黃州蘇州軍斬僞王黃十  
四八月斬湖州賊僞偕王譚體元竝僞樂王之子莫桂  
先江西軍斬逆首洪元珍金信擒僞壽王李瑞生於鉛  
山僞堵王黃文金卽黃老虎於甯國途斃是月生擒僞  
幼逆洪福瑱同擒僞昭王黃文英等是年分竄陝西股  
逆下竄湖北生擒僞端王藍成春其最驍健之僞扶王

陳得才服毒自盡掘其尸剗戮之計惡賊之伏顯誅可稽者一百三十五人逆魁僞國宗及著名逆黨已詳記中者不與焉我軍每接仗必有斬戮或僅知名姓或僅知僞官皆未之記更有未經查報未見邸抄者不知凡幾所記第十之一二耳

聞大惡者不死於病黨逆之稽誅有待耳或云多竄死豈亦有幸哉僞將軍韋志太陷九江甯回江甯城張遂謀僞東殿右十二承宣劉滿僞水五副將軍踞湖口宿松官兵克復未生擒陳仕章以援鎮江襲湯頭河官營

力僞授夏官副丞相僞將軍黃金愛童客海俱劇賊李  
秀成所統轄甘心効鷹犬者金愛常從陳玉成守桐城  
玉成赴皖金愛護之出返遇官兵伏起夾擊之金愛逃  
水匿數十刻而遁而客海間道走海上招賊二十萬助  
秀成犯浙西陷金華紹興諸州縣後見秀成勢浸孤一  
夕遁去不知處此賊之尤健黠者同治建元泰西就撫  
朝廷得專力勦賊諸帥展方叔召伯之略麾下將皆効命死  
戰龍驤虎雄楚南北江左右浙東西以次奏膚功而賊  
勢益蹙洪逆奪魄恐諸賊渙散乃濫加僞王號爲困獸



計於是陸順德爲僞才王范汝曾爲僞首王黃呈忠爲  
僞戴王陳炳文爲僞聽王陳德風爲僞鬆王莫仕葵爲  
僞補王皆菜傭質不能爲逆區畫或於克金陵時授首  
或於竄江西時被殲皆不可知惟僞侍王李世賢素多  
詭計常與劇賊陳玉成李秀成等多方解金陵困玉成  
秀成先後俘獲而世賢竄往江西福建又僞啓王梁成  
富等先擾陝甘後與捻匪合欲援金陵至湖北蘄水縣  
境爲官軍擊散竄往河南山東計稽誅勁賊者數人耳  
陳玉成粵西賊渠陳承鎔之姪兩目下有黑癍二賊中

呼爲四眼狗性凶狡嘗殺自永安至江甯未與戰鬪事以其幼也咸豐四年隨賊會上犯湘潭而玉成志在武漢領一隊入梁子湖達武昌踰城而上遂陷之竝踞漢陽城授僞殿右十八指揮嗣陷田家鎮踞廣濟黃梅連陷九江捨死苦戰趨捷先登僞封爲成天豫與李秀成同事獨久爲賊中魁渠秀成亦籍隸粵西初爲二十指揮僞東北二賊屠戮後始與玉成同用事授僞地官副丞相盤踞皖省援倚玉成安慶之屢陷而艱克者二賊爲之蠹也玉成爲僞朝正掌帥秀成副之戊午春秀成

營蕪湖渡江過西梁山至和州破何林鋪官營二十座  
擁衆投全椒是時玉成亦由羅田麻城敗歸相會樅陽  
竄三河擾皖楚賊勢復振先我軍屢圍江甯玉成設法  
抗拒而秀成獨領賊目陷杭州以掣肘我軍會江南分  
軍扼賊要害絕其糧運張提督玉良馳往克復秀成由  
廣德州回金陵玉成亦自潛山太湖下江浦合攻金陵  
大營時援浙之軍未歸致蘇常相繼失守賊中相譁爲  
六解京圍云秀成旋由蘇州竄踞杭州洪逆施羈縻計  
封玉成僞英王秀成僞忠王竝以黃綾書萬古忠義賜

秀成秀成愈疑懼又畱秀成母於金陵陰以爲質玉成  
竄江北值安慶爲我軍克復乃死守廬州十一月初四  
日爲多將軍攻克玉成走壽春苗沛霖誘至昇官軍寸  
磔之其部賊悉歸秀成同治元年冬官兵悉精銳困金  
陵城洪逆召秀成回援秀成復竄擾江浦舒桐六安爲  
圍魏救韓計我軍不爲動乃敗歸固守三年春賊營壘  
盡失死守孤城五月二十七日洪逆仰藥死六月十六  
日官兵克復江甯城秀成以善馬投逆子福璉遁而自  
乘劣騎突圍出被擒髮逆遂平自倡亂以來十五年逆

魁渠相繼屠戮或臨陣誅擒終始助亂盪巢後嬰重誅者惟秀成一人玉成先誅二年餘均劇賊之尤稔惡者秀成初名以文授僞王時洪逆改今名而玉成亦初名丕成

按首逆及逆宗十三人逆魁僞王五人渠惡四十八人僞國宗五姓共十三人嬖倖十人伏顯誅可稽者一百三十二人稽誅者十餘人劇賊最久後誅者二人統計不過二百餘人耳僞職以千萬數大抵銜虛名張聲勢溫飽弗獲况榮貴乎且倡亂

者萬餘至江甯存者僅數千受僞職者百數其餘  
皆出入鋒刃冒寒暑而死耳夫民卽無良貪聲色  
嗜貨財未有渴飲酖而饑食堇者粵西處蠻瘴之  
鄉皆慄悍以劫奪爲事故輕犯法從逆至此又無  
循良吏申明令憲以撕警之禁其強暴懲其讒蠱  
安其生業開其正性俾長享耕鑿爲

盛世氓也逆魁之煽惑愚民者動曰富貴自永安以至  
金陵賊擄金帛必悉入庫男女行異列居異館犯  
禁者誅夫婦母子不相見親戚眷屬不聞問亦何

樂爲賊也富貴安在哉而逆首則端居房闈擁美  
姬豔妾窮極淫慾靡明晦彼從賊能勿痛心疾首  
乎官兵又目粵西爲老賊戮不待時人窮返本其  
悔入迷途而控愬無門者亦重可傷已茲記獨詳  
著始禍者顛末俾知槐國之衣冠不長身首已尸  
於藁街而愚頑無識者庶不爲驍桀誑誤焉

平定粵匪紀略附記二

詆言之興圖讖爰始若五威符若五斗米誣罔不  
道詿誤未已辭而闕之庶返正軌作邪說記第二  
嘉慶初白蓮教起始湖北長陽浸淫襄鄖巴東諸州縣  
四川達州賊應之由川入陝而豫而楚賊之最悍者惟  
齊王氏劉之協教魁也六年後梟賊以次悉伏誅而八  
卦諸教蔓延山東直隸界大吏嚴捕密緝僅獲渠惡其  
餘率以教不爲匪見原根株蓋猶有存者未幾有林清  
王倫之變他如紅陽青蓮諸怪誕不經之說及添弟會



無爲教等名目寫僻多有之我民晏然處

昇平之世目不覩弋鋌耳不聞鼙鼓風鶴忽警何以全身  
命於鋒鏑之餘乎洪逆倡亂於道光三十年由粵東狗  
頭山朱九濤始亦踵襲前匪而狡飾尤出人意表初造  
邪說則云鑄鐵香鑪成可駕以航海

秀全既師事九濤陰結羽黨久知其教不足大惑衆而  
行其志乃至粵西桂平縣與其妹婿蕭朝貴比鄰楊秀  
清深相結又得廣東花縣人馮雲山倡立上帝會自爲  
教主人其會者歲納香銀五兩聚男女無拘男不論長

幼概曰弟兄女不辨婦姑總曰姊妹

既立上帝會洪秀全自以爲天父第二子降下附會泰西教謂耶穌爲天畏子已乃耶穌弟詭稱天父名火華諱火爲炎華爲花編造讚美經咒以下元轉運紅羊劫數已臨入其會者受享快樂潛圖不軌之舉

逆仿泰西教亦尙禮拜初每食必禮拜羣跪合啐至金陵以七日爲率禮拜必夜半辭云讚美上帝爲天聖父讚美基督爲救世真聖主讚美聖神風爲神靈讚美三位爲合一真神真道豈與世道相同能救人靈享福無

窮智者踴躍接之爲福愚者醒悟天堂路通天父鴻恩  
廣大無邊不惜太子遣降凡間人知悔改魂得升天

逆首之禮拜也有疏文仿青詞例實鄙俚不足辱筆墨  
姑錄其一文云小子某同衆小子外小跪在地下禱天  
父上主皇上帝老親爺天兄基督親大哥今於某月某  
日禮拜之期理宜虔設茶菓鐙亮頌德歌功酬謝天恩  
懇求天父時賜聖神風化醒天下萬國臣民早日回心  
共同讚美天父上帝權能太平一統祝福小子等百戰  
百勝事事如意有衣有食無災無難永保平安共享榮

光天子萬年託救世真聖主天兄基督贖罪功曹並託  
禾乃師贖病主功曹轉求天父上主皇上帝在天神靈  
在地如在天焉俯准所求心誠太平天國年月日

僞歷日尤狂謬無稽其書無凶吉空忌以二十八宿值  
配之而定歲而閏日而無閏月年以三百六十六日爲  
額僞進歷表云當今天日平勻圓滿無一些虧缺某等  
造歷以三百六十六日爲一年單月三十日雙月三十  
一十立春清明芒種立秋寒露大雪俱十六日餘俱十  
五日乃是天父上主皇上帝遣我主降凡旨意也從前

歷書盡行刪除年月日時皆天父排定年年吉良月月吉良日日時時亦是吉良何用選擇

賊中所諱字最多除天父名火華改火爲亮華爲花外如天字上畫寫微長人名則避作添上爲上帝稱餘作尙老作考基督耶穌別稱也亦避之凡文書僞章奏禁勿犯不得已用者基以居督以率秀爲繡全爲泉逆名也無足怪可怪者不用鏡而以鑑代矣不用聖而以勝代矣龍神物耳福吉名耳而諱龍爲隆諱福爲復奚取也有國者無以國爲忌孰不願業之光孰不樂德之明

加水於其旁獻案之書重囚名有龍鳳字也準之以爲  
例陋且自貶矣國之改爲國一作郭丑爲好卯爲榮亥  
爲開鬼爲人更不知命意之所在矣

此外又有隱語焉火藥改爲紅粉礮子爲元馬遺矢爲  
調化溺爲潤泉百姓爲外小呼孩以愚從其鄉之俗稱  
也以疏附稱文報以升天稱死亡至礮形製巨世所呼  
爲大將軍者則以爲洋莊心爲草真草好心也反革變  
心也起程爲裝身斂費爲科炭錄其特異者餘皆劫盜  
常談耳

洪逆踞金陵其下皆呼以萬歲以九千歲呼楊逆蕭逆  
八千歲馮逆七千歲韋逆六千歲祝詞至五千歲止唯  
石逆與焉僞燕豫僅呼王千歲而已及楊逆將併誅自  
以爲功德無二令衆稱萬歲衆稍稍難之自請於洪逆  
逆親詣之曰弟稱萬歲甚善顧何以稱我答曰可尊兄  
爲萬萬歲

楊逆最技能惑人暗偵賊營中密事羣小微有不服意  
或背面反脣詭稱天父降體摘發陰私俯首伏罪相譁  
爲真天父所教往往杖及洪逆不敢違忤已有不韙亦

伏地令其下杖之以示公

逆每託天父附體喃喃口述旁有載筆者記重複雜沓  
彙錄分編統名寶誥刊刻頒行今通軍熟讀傳習免犯  
天令方得天父天兄歡心也欸筆曰高老山山令遵正  
十字祈祈

賊中最敬者天父追其所自出云有叔嫂姦而生耶火  
華火華天父名也天父有五子一女長降凡爲耶穌第  
二子洪逆也惟楊逆得稱爲二兄餘皆不敢也馮逆第  
三子楊逆第四子韋逆第五子蕭逆非子也乃火華婿



女名宣嬌實洪逆妹而云天父女降凡爲朝貴妻楊逆私通之嘗共臥起衆猝至徐整衣坐傳天父令曰宣嬌秀清同胞兄妹臥何嫌我令秀清臥爲天下兄弟贖病也令宣嬌同秀清臥爲天下姊妹贖病也遂自號禾乃師贖病主

據武宣東鄉時賊尙微官兵四圍邀截之賊有懼竄心復託天父下臨諭衆曰衆小認得天父天兄真麼衆齊跪對曰理會真天父真天兄又曰爾衆小認得爾主上真麼對曰理會我主上真乃曰我差爾主作世界主出

一言是天言行一事是天事爾衆小須真心扶爾主聽  
爾主狐疑不得怠慢不得若不顧爾主爾衆活不成天  
兄耶穌隨降壇曰戒人者不自在自在者不成人愈苦  
愈樂愈威風諸放心諸信心任妖一齊飛一齊變總不  
脫走我天父掌上過

逆每令衆賊宜公不宐私然所諄諄告諭者欲專利於  
已耳其在永安僞令曰各軍各營總須一條心對緊天  
父天兄繼自今衆兵將一切殺妖取城得金銀玉帛寶  
物不得私藏盡歸聖庫又令大小衆兵將千祈遵天令

歡喜踴躍堅耐威武同心同力向前頂天父天兄綱常  
今爾衆知外妖多端誘惑否妖路傾邪否知得天父天  
兄前言定准否果能立志盡忠報國天父天兄自有光  
照雨衆小旣幸爲天父子女天兄姊妹享福無窮莫惑  
詭計立整綱常醒醒莫教天光鬼迷也不得再私藏私  
帶諸珍物漏繳天庫者卽爲大不忠犯天條莫比

逆僞造新舊聖書其舊者摭拾約翰福音諸洋書所謂  
新聖書者皆逆頒僞詔共馮逆臆造而成有太平軍曰  
太平禮制太平條規又有書曰三字經幼學詩尤俚俗

不可入目倡亂諸逆所造也其餘諸箴諸論諸門聯則被脅士子不得已而爲之或陰寓譏訕於贊揚之中如天父爲姦生理人作埋人詞意固權譎可喜實於雅化多乖也悉屏之不錄

僞天條十事背者誅無赦其殘忍苛暴歸逆蹟類至可發大矇自相矛盾者縷述之其說不許拜邪神不准殺人害人教人孝順其父母不許姦淫不許竊搶凡欺詐有禁起貪心有禁耳目口鼻俱有箴男女有別夫婦無同宿不許私相往來通閨問脅從人衆令朝夕誦讀贊

美鄉愚多不識字遂責識字者口誦之故每館必有通  
文墨呼爲先生者逆所踞之地必鳴金集衆築壇場張  
鐙彩鼓吹推老賊一人升高座論說天條名曰講道理  
然時以講道理爲名者皆有所爲也凡擄衆搜糧必講  
道理倉猝行軍出令必講道理選女色爲嬪妃必講道  
理驅蠶丁壯夫爲極苦至難之役必講道理究其道理  
之必講則稱天父七日造成山海莫大功德天王東王  
操心勞力安養世人功德巍巍道理應供奉歡喜娛其  
心志暢其體膚爾眾小安得妄享天父之財祿驕淫怠

情犯天條律但生退悔前勞盡廢

逆所過名城繁鎮梵宮寶刹必毀拆殆盡朱碧紺黃悉  
薪之金身法相悉火之以爲木妖也性不別珍玩概指  
爲妖物三代鼎彝價值兼金者必搥碎而後止大江以  
南至臨安藏珠玉名圖書墨蹟者縣不下百十家寒素  
之儒亦必購精室數楹花圖數畦庭儲竹石座列琳琅  
爐香盃茗娟潔靜雅異尋常皆爲賊所忌至則顛撲燬  
燼無完者竝災及架上諸卷軸娜嬛洞府之篇石渠乙  
閣之秘無異祖龍再來也甚者蟻以爲厠籌匡中傷心

人每假祝贊會以咒之曰雷殛天王火燒東王賊亦罔識其詞意

賊令尤嚴男女之辨行軍所擄男歸男營軍帥統之婦女則別置後營粵西老蠻女統之至金陵設館鈴束更甚行營間有混迹女館逐日搜查立門牌以館長出名統其下月送冊僞詔書館核數雖粵西老賊亦不敢亂羣肆行強暴閨秀得恃以自貞咸豐五年後分配之令下高格者娶婦至十人卑亦不減三四人顛倒抑勒飲泣含冤不可殫述其潔白自矢者惟墜井投繯而已

逆悖謬人理有不可自解者錄其小節可以知其大凡  
首禍者隨處淫掠萬衆髮指而僞西王蕭朝貴其父在  
長沙途中密遣賊招朝貴母同臥衆覺白楊逆轉達洪  
逆皆出原之而朝貴公訟斬其父母警衆且揚揚語人  
曰父母違犯天條不足爲父母也逆出僞示死不用棺  
用則爲妖香火不設設則爲邪死爲昇天享受天堂極  
樂爲莫大喜事不許哭其傳教然也而楊逆子死購梓  
木爲棺含殮以珠玉希世寶物錦裏繡裝葬之日衆賊  
備鹵簿祖道逆淚下如雨目自是失明



逆之僞名號必假天以寵之如贊天安侍天福成天豫  
定天福其勲階也餘如僞侯相鮮不銜以天者有佐天  
頂天等名目又加牛鬼蛇神字而風師雲師雷師雨師  
更駭人聽聞焉其僞官無職有虛名者尤不可枚舉約  
計僞丞相有正副又正副春夏秋冬金木水火土合天  
地名員數四十四恩賞無額升擢之漸耳僞檢點三十  
指揮三十六均以殿前左某右某名之僞將軍總制隨  
事分派之各僞王俱有僞官數十人僞朝官有左右史  
侍衛統於仲后典諸物有官掌朝儀有官侍臣者主出

入僞詔書詔命章奏數人而已女內官有軍帥檢點巡查百長權傾男官師出有師帥旅帥卒長兩司馬皆以軍帥爲之主而監軍統之鄉官視所陷之地大小爲多寡職名近萬人實食祿者僅百計

流俗謔曰賊有妖術溜報亦載之獲賊訊詞實無此說然好奇者猶詫談不衰始與官兵戰大黃江囊截下流江水爲之壅塞亦訛以傳訛也反風焚屋之說長老親見其謬火蛋延燒浸及駐館之處挽水撲救雇夫匿笑譁有妖婦胡二媚能呼致風霧騰空指揮所向無敵人

自賊營逃歸云賊勢初尙微假術驚妄對壘時槍火競轟煙燄漲目賊縛幼女長竿上豔裝綵服如賽會抬高故事者煙散卽撤去

逆每慶生辰先數日通令脅從士子投名進貢院考試約如科舉儀試非策非文出題以所刊諸妖妄書如四海之內皆東王真道豈與世道相同論試畢誕期傳臚取鼎甲三人翰林十餘進士百人卽冠以龍鳳冠錦袍游街東北翼亦然然不過壯觀瞻而已未聞授以偽朝事少有知識者多逸去逆黨亦置之不問

逆於洋煙禁最酷酒次之尋常截長竹作管製銅器若  
斗形相呼煙袋者亦目爲黃煙禁男女吸食而逆首僞  
宮嬙嬪則玉綴金鑲旦晦吐納罔所忌間有薄譴警衆  
者則以言語不遜逢怒取憎也賊衆遂於密室偷嗜之  
市中居爲奇貨價與洋煙同

同治三年賊勢日蹙孤城四困外無救援城中賊日一  
食雜惡草具尙不果腹逆酋李秀成自浦口竄回鳴鐘  
鼓請逆算備作先事計逆侈然登座云我奉上帝聖旨  
天父天兄命我下凡作九州萬國獨一真主何懼之有

去畱任爾我鐵桶江山爾不扶助有人扶助我之天兵  
百萬千萬妖兵豈能飛入耶

平定粵匪紀略附記三

陷我名城指不勝數毒我烝黎目不忍睹視民如傷維我

聖主殲厥渠魁六幕安堵作逆蹟記第三

前記逆匪造等等邪說猶託空言也其實犯逆蹟有令人髮指者傳教時僅洪秀全一人蓄髮潛匿窮谷中人罕識其面及金田倡亂則凡所裹脅悉禁薙髮以防背逃故遠近目爲長毛亦云長髮賊及陷金陵後分黨四擾擄人益多逃者益衆乃令新擄者刺字於左右頰左

曰太平天國右曰某軍某隊傳以靛華歷久彌顯自拔  
後以藥漬爛深且及骨更有於腦後用火印烙去其髮  
亦有盡剪髮辮者

賊中服色尙黃僞王俱衣黃袍繡以龍冠亦如之僞侯  
以下亦衣黃袍僞指揮以下則衣紅袍其褂及半臂短  
後衣皆繡龍鳳任意爲之無定制男女皆首纏長巾雙  
拖至臀僞旅帥以上用黃下則紅或綢或布悉聽裏紅  
者多故江淮間呼賊爲紅頭其風帽亦用紅色緣以黃  
以綠之廣狹爲別僞侯之帽緣用三寸二分僞丞相之

帽緣用三寸餘以差等損之次一級卽狹二分夏用角帽竹帽均飾以龍鳳獅麟及花卉蟲蝶帽額之中懸一牌繡僞銜於上

賊中旂幟亦有差等僞東王黃旂綠緣方一丈僞西王黃旂白緣方九尺五寸僞南王黃旂紫緣方九尺僞北王黃旂黑緣方八尺五寸僞翼王黃旂藍緣方八尺諸僞王所隸牌刀手衣色及緣均如旂制僞侯僞丞相以下俱用三尖黃旂緣以紅牌刀手俱黃衣紅緣僞將軍以下俱三尖黃旂牌刀手俱紅衣黃緣僞監軍以下亦



用三尖黃旗牌刀手俱紅衣綠緣旗制亦別以廣狹次  
一級者卽狹五

賊至金陵毀總督署爲僞宮復占大陽溝一帶民房以  
擴其址役夫萬餘人興築幾一年窮極侈僭工甫竣火  
起燔爲焦土復築如初克城後逆子積薪以焚存僞大  
殿及垣牆數處其僞殿雕鏤工巧所盤螭龍以赤金爲  
之爲土人挖去楊秀清韋昌輝石達開各建僞府馮雲  
山蕭朝貴早授首其子亦襲稱僞王建府後凡授僞王  
者無不建府皆併數家大宅而營造之我軍入金陵時

焚折略盡存者約五六耳

賊設僞官分朝內軍中雜職爲三途僞朝內自王侯以下有豫燕福安義五等各繫以名如承天豫預天燕之類復有掌朝掌率尙書僕射承宣侍衛左史右史疏附等僞名其賊軍中則有監軍軍帥師帥旅帥卒長兩司馬等僞名其雜職司賊之食用者一事一官皆曰典有典糧典油鹽典礮典紅粉典鉛錫典硝典旂典鐵典庫諸僞官又有宣詔書拯危藥材買辦宰夫諸僞衙司賊之勒索者一邨一官皆曰鄉更有職同恩賞等僞職或

妄託古制沿其名而悖其意或勦襲稗官踵其誕而循其名封賞不時改革不一曾見有撰僞官表者大率以節令星辰肆意編造一僞職有至三十餘者爛羊都尉竈下中郎猶不足狀其惡態也

傳云齊人輟高渠彌輟謂以車裂人也逆匪無車代以馬凡老賊欲投誠而事洩者以五馬裂其尸王子十二月賊陷武昌初十日在閱馬廐高設一臺賊目登其上曰講道理鳴鑼於市命闔城人往聽不到者死無赦有漢陽生員馬姓特至臺邊與賊目辯論繼以痛詈賊不

能屈令以五馬縛其肢首驅令分裂馬忽蹏蹏百驅不前而馬生罵不絕口賊不得已刃戕之馬通人性亦忠義之氣有以感之

賊之酷刑極多剝皮炮烙之外更有所謂點天鐙者將人自頂至踵纏以棉紙浸以麻油復塗以松脂白蠟倒植而燃之呼號之聲慘不忍聞有至脛卽死者亦有至少腹始死者僞丞相曾立昌伏誅於豐縣僞指揮魯姓逃回江甯楊秀清大怒卽以點天鐙刑殺之火已及心呼號猶未絕

楊秀清在賊中以能事稱其用兵悉踵稗官小說以惑人爲本如軍中誦讚美畢必齊呼曰殺盡妖魔和聲如雷以顯其衆復多張旂幟盛陳儀衛以迷我軍耳目是以人多畏懼久乃漸諗其詐昔楚兵堵城之敗有逃出者云親見賊中有騰空者致全隊驚潰嗣鞠老賊始知賊衆接仗時在後之賊乘槍礮煙迷之際各脫紅黃短衣向空拋擲兵勇遙見誤以爲能飛也又有術名發猖臨戰時賊首喃喃誦咒殺雞滴血入藥酒各予一杯云飲此卽有天父天兄佑助足避刀劍實則投以猛烈之

藥令人焦躁奮不顧身所謂發猖者發其猖狂耳曾獲  
一賊臨刑時默誦有詞疑爲持咒諦聽之則第云天父  
看顧小子而已其詐其愚皆類此

賊中號令亦惟鳴金擊鼓吹角搖旗而已有晚今最爲  
詭秘賊軍中自兩司馬至監軍皆有正副每夕副者守  
館正者聽令兩司馬至卒長館卒長至旅帥衙遞而上  
之無敢或誤凡所秘計皆於此時密授之

賊之荒誕暴虐亡可跂足待何尙支梧十餘年之久則  
其軍制有足恃者每軍一萬二千五百人以軍帥統之

將軍總制各一轄監軍監軍轄軍帥軍帥轄五師帥各分領二千五百人每師帥轄五旅帥各分領五百人每旅帥轄五卒長各分領百人每卒長轄四兩司馬兩司馬領伍長五人伍卒二十人共二十五人其行陣也有牽縋螃蜞百鳥伏地四名牽縋者自偽兩司馬以至偽軍帥一縋單行也螃蜞者三隊平列中以拒敵左右包抄也百鳥者以二十五人爲一小隊分百數十起散布如撤星使我軍無處著手也伏地者用避槍礮及遇險作疑兵也冥頑之輩何知兵法大率師心詭造用之有

效則詫爲獨得之奇及我軍久與交鋒習其常技無非  
一行一伍合以制其行分以制其伍則黔驢技盡篋勿  
克矣

逆氛所過朝發暮休必止一邨一鎮賊目據大宅羣賊  
亦各據民房謂之打館四出覓食每館各派五賊輪支  
五更不用鍋帳無所爲紮營也一遇官兵近逼或欲久  
踞之處則必堅壁以守其術遇江河則夾水爲營中以  
船隻作浮橋橫以鐵索而守其兩端遇山嶺則前築土  
牆山腰山頂分立數壘遇邨市則包屋爲營凡土牆之



外必浚二濠第一道徧插竹簽第二道作複壁以雜物實之每一營中必設望樓於至高之處拆民房爲之晝夜易人瞭望見官軍至則吹角與接仗則擊鼓磨旗我軍知其術先據形勝則必宵遁

賊分金木水火土五營各以類從惟土營用挖煤人夫仿鑿翻法專以穴地攻城爲事賊中謂之開壠口至爲險毒然善守者以甕埋地伏而聽之何處有丁丁聲則尋其聲而對掘一穴或灌水或薰煙或填火藥斃賊極易卽轟城成闕果能奮力抵禦亦可補繕保守如湖南

江西省城及金陵雨花臺各營壘皆屢著成效

賊僞律凡六十二條稱點天燈五馬分尸者三斬者四十一商鞅定法尙不至若是之酷欲不速亡得乎

賊嚴搶奪之令必官軍在三十里外始准擄劫若官軍在前有取民間尺布百錢者殺無赦每戰敗則競棄金銀首飾於道誘我兵爭拾則乘間逃亡更有伺我氣懈糾黨復戰者軍無紀律輒受其害

賊之所至先貼僞示令人貲送首重米穀次則銀錢珍寶名曰進貢給以字條名曰貢單云貼於門首則賊不

敢擾人爭趨送單貼門首爲護符殊不知後到之賊稱  
屬別隊照單復索疊擾不已最後則入室搜劫罄所有  
而後已更有專事搜括之賊名曰打先鋒每至一處卽  
肆意擄掠必招本地無賴爲眼目就富家大小以次搜  
索有豫爲埋藏者亦十不免一蓋賊至傾水於宅週坎  
卽入從而掘之有溝渠則耳水以求無不得者是以逆  
氛所經蓋藏如洗

賊於安慶大星橋立椎關因沙洲基地增築丈餘四圍  
甃以石上建崇樓撥礮船十隻環之鐵鎖木筏橫截江

濱以阻民船九江蕪湖均一例創設沿江州縣岔河小港地當衝要者亦設立偽卡徵收雜稅

行軍恃火器而賊無硝磺每陷城必盡拆舊牆令各館年老人鎚碎煎燉成硝以配火藥據逃出難民云用與常硝同惟陰雨時輒滴黃水又曾立昌踞揚州時圍攻日久賊藥無磺用燒酒煮煙葉以代每見開礮作黑煙鉛子出城卽落不能及遠也

從事於大營者皆言賊不善戰而善守究其守法則惟酷刑以警衆耳我軍攻城屢斃守陣之賊日以百計從

無一避者後擒餘匪鞠之始知守城之賊皆鑲足於垛口故不得動其惡毒真出人意料之外

僞英王陳玉成人呼爲四眼狗兩眼胞下各有大痘癰如四眼故名玉成亦居之不疑凡狗以子交母則眼上有白點玉成固其類耳賊中又有名三眼狗者亦驍健善戰爲張提督國棟所戮

賊有僞典金官率衆出城守門者疑之搜其身各懷金數百乃白僞東王楊秀清閉城大索殺藏金者二百餘人因搜出男扮女女扮男及孕婦各數十人悉殺之

自金田至金陵別男女甚嚴夫婦同居亦謂犯天條當  
斬蓋恐賊衆顧家不與力戰而仍設女館挈家同行以  
繫戀之計甚譎也迨咸豐五年正月僞天官丞相曾水  
源往蕪湖誤期削職其弟怨悔逸去首逆怒疑水源所  
使磔之因詢心腹賊何以舊黨亦效新附私逃答以在  
永安時言至金陵爲登天堂許夫婦團聚今仍不准有  
家恐此後逃者更多首逆乃下僞令許男女配偶設僞  
媒官司其事凡男女十五歲以上至五十歲者皆報名  
指配僞丞相許配女十餘人僞國宗配女八他僞官以

次遞減無職者亦配民女一人由偽媒官掣簽指婚有老夫得女妻童子獲鳩母者均弗之易貞女節婦自裁者數千餘輩女館遂空

東逆楊秀清智計陰鷙方女館之未配也恐閒居爲不善除工作外時傳僞令以勞苦之時而令每女館各覓井欄一時而索小鼠數枚時而索蜚蠊數對限日送僞府違卽治罪愚者詫爲神奇猜度其作用實則送至卽棄之耳

僞丞相鍾芳禮性稍和平司賊衣因廣招機匠庇護之

投充伏匿者幾二萬人又周才太爲僞巡查性不好殺  
請於首逆設牌尾館收養老弱病廢者使守館掃街道  
佯病入館者七八千人賊封菜園招人種泊匿者亦數  
千人後內應事洩搜三處得大營文憑數紙殺數百人  
於是廢牌尾館挑機匠及種菜者爲賊兵僅存機匠二  
千人種菜數百人

賊之僞官以數萬計僞王亦分五等東西南北翼及僞  
干王洪仁玕僞安王洪仁發僞福王洪仁達爲一等僞  
英王陳玉成僞忠王李秀成僞侍王李侍賢爲二等僞



堵王黃文金僞聽王陳炳文僞驛王陳德風等領賊兵者爲三等僞卹王洪仁政僞昭王黃文英等或首逆宗人或劇賊兄弟亦連類受僞封爲四等其初必有功始獲封後凡粵中老賊無不王者據黃文英供指僞封列王二千七百餘人妄亂古所未有

粵禍初起我兵往往怯敵益賊驅新擄者居前退後必誅故非舍身衝鋒無生理我兵則進戰始蹈死機也及樹免死旂後脅從者每戰必來歸賊復變計以擄人居中悍賊前後挾持之故非獲大勝不能救難民

僞丞相賴漢英率衆犯江西時埋地雷一屈期舉發城崩數丈羣賊摩厲將登賴逆誤記有第二雷戒勿動久待不發城口復完羣賊交咎之賴猶未信乃檢視僞土將軍報文始知只一雷乃大悔恨適援軍益健知不可犯遂遁歸

賊令嚴凡戰敗歸者不許入金陵城令別竄一地以圖功故從逆者必死戰死守

逆再竄河南時數賊首各擄一幼童約六七歲被以黃袍昇以綵與欲竄何處輒決之若爲尸者初疑所昇必

偽幼主後獲訊餘賊始知其無能爲

咸豐四年八月二十三日我兵二次克復武昌省城逆衆於大宅中多置火藥燃香其上入者觸之輒被焚燒是日城內發地雷三次震死官兵數十人

賊陷江甯後脅十六歲以下幼童閹割之送偽東王府以供役使罹其禍者百難存一

楚逆擄幼童以數千計酷刑虐役每戰敗後輒大加殺戮以洩其憤其慘毒如此

各賊偽署皆拆大廟宇樑棟修葺之木植狼藉一床之

費可值千金

賊擄幼童或爲子稱曰公子或爲弟稱曰老弟皆不免以俳優畜之最可恨者遇拒敵必使隨行遇刑人必使劊刃以練其膽雖恟恟子弟入賊中數年無不變爲兇悍者

殺人刳腹實以芻豆和血飼馬是以接仗時賊馬奮迅如欲噬人者蓋踵闖獻之舊惡也

賊遇官兵勢盛輒挑人充先鋒造黃馬褂數千件願前敵者服之人爭效死

李秀成陷蘇杭後洪逆仁玕與之書云夫長江者古號長蛇湖北爲頭安徽爲脊而江南爲尾今湖北未得倘安徽有失則蛇折其中雖生不久促令攻湖北援安慶幸李秀成憚於遠出不聽我軍遂拔安慶據上游以成戡定功殆天奪其魄也

竄陝西各逆與捻匪合股騎馬賊極衆慣用套馬索縛長竿以拘我馬隊後以籐牌隊斫馬足破之

洪逆陷金陵欲長驅北犯斯時河以北未設防無堅城大局幾不堪設想賴一老舟子倡言北路乏水缺糧不

如建僞都於南京楊逆等爲然乃止不知此舟子爲我計爲賊計要由天誘其衷耳

賊用兵頗詐而膽終怯氣終餒我兵苟能堅忍無弗克敵者

自粵西肇亂以來我兵屢有挫失蓋兵不厭詐賊能用計而大軍惟以正兵擊之鮮克有濟及接戰稍久熟其逆謀惟避實搆虛聲東擊西之一策我軍能戰則設計以紿之我軍能守則誘戰以疲之荆楚居天下之中賊爭以全力相持最久知其長技處以逸待以靜遂能破

奸謀而制其死命

賊亦知軍中有鼓角鼓則取之廟宇無角則折竹爲觚如市井兒以爲戲者人持一枚遇官兵卽吹之其聲鳴嗚然美其名爲聖角云

洪楊二逆蹤跡已詳賊名記中後又聞人云洪逆本姓鄭道光二十五年至廣西入洪德元添香會德元死遂冒其姓代爲教首教中口號云三八二十一蓋以洪字析之也楊逆本名嗣龍湖南衡州人其父楊大朋因傳教伏法楊逆流徙廣東遂爲嘉應州人

洪逆會習耶蘇教如以佛象爲磨鬼每日誦讚美七日  
一禮拜皆教中事楚南有辟邪實錄闢之甚詳後洪秀  
全欲駕而上之復造種種邪說蓋竊耶蘇教之唾餘而  
踵白蓮教之惡蹟又屬彼教中之罪人矣同治三年四  
月二十七日官兵攻金陵急乃服毒死猶宗邪教囑勿  
用棺槨以黃龍緞袂裹尸誠至死不悟也

賊之逆蹟罄竹難書約記四十則不足以盡其罪  
狀俟續有所聞補登之



平定粵匪紀略附記四

忠節湮沒疇與表揚天人感應孰倣凶狂亦有災  
異迹非荒唐記聞見之所及以昭

萬年有道之長作瑣聞記第四

漢儒有言人事動於下天變應於上兵興後蚩尤旂機  
槍星屢見至咸豐十一年八月朔日月合璧五星聯珠  
識者知止戈在邇甫三年重城盡克兵氣全銷

黃巾之虐猶如敬禮康成不犯高密保鄭公鄉他如倉  
卒遇賊有子願代父死弟願代兄死者賊輒嘉其義兩

釋之史冊所載代不絕書若夫身捍危城力竭効命者  
草竊之徒亦知起敬蓋天理自在人心狂寇亦有感動  
也獨粵匪則大不然無論賢不肖悉肆屠殺屢有骨肉  
相救呼號乞代者輒兩殺之偶陷一城一案必盡戕官  
吏有自裁者更鬻割之暴骨於市我

國家深仁厚澤凡被害文武一經入

告無不立沛

恩綸

優加矜恤或予襲謚或建專祠以一兵一勇之微苟能死綏

罔不彙加

旌賞

闡揚之典具詳

國史矣其忠魂不泯最著靈蹟者有數人焉甲寅二月賊陷江甯上元縣知縣劉同纓朝服坐大堂厲聲罵賊竝誠賊勿傷百姓賊衆擁至城北縛樹上攢射之更毀其支體閱三日有夜行後營者見榛莽中白光上騰諦視見一骸猶著韡光自韡中出探得一手摺條陳六事結銜上元縣劉某始知爲劉令遺骸昇歸覓小木匣裹以布

潛埋清涼山麓暗爲標誌後其地夜輒有光潛埋者過墓而祝曰光芒萬丈忠魂結而不散也然恐賊人驚異尋掘不如韜晦爲佳祀畢其光頓斂又甲寅三月初十日賊陷德安府署安陸縣知縣萬成獨立府署大門外賊至拔刀指罵且斫之羣賊攢刺身無完膚更剖腹實爆竹於中聚火轟焚皮骨燔灼殆盡賊踞一月始他竄民感其德憫其死尋得殘骸零骨泣而瘞之旋示夢於邑生徐鍾湏通身作金色光謂所檢頭骨非是幸棄之次日糾集紳民復爲開視諸骨皆金黃色惟髑髏一具

碑骨一片焦黑不類因剔出改葬於漢黃香墓側蓋生時嘗謁香墓歔歔流涕願他日葬遺骸於此猶梁伯鸞之願埋要離塚旁從其志也又賊圍武昌半年精盡援絕六月初二日大東門啓前署按察使李卿穀約候補知縣俞恆清同縊於寓館之後樓從死更有屬官數員僕從二三人賊目睹其室每欲登樓必有異香襲人頃刻頭痛欲裂遂封閉之李臬司長子孟華時爲道員自粵帶勇由湘南勦賊至湖北八月二十三日克復省城先縊而入匍匐以尋父尸至高樓見髑髏白骨紛布樓

上獨其父尸面色如生絲毫無損泣血殞之賊氛所至  
異聞實繁此則共知共見者

偽天德王洪大全之就擒也賽大臣命郎中聯芳主事  
丁守存等押解入

都時賊由永安突圍出謀奪大全相距僅半程鄒巡撫飛  
書促其兼程前進七日而抵全州守存知大全衡山人  
恐道經其地爲會匪劫取因改由水程灘行出祁永八  
日而抵長沙并傳牌驛站一體預備護送虛張聲勢俾  
賊不疑初大全登舟守存令人置於內艙塞其窗無少

陳大全不知船行之速每曰到衡州須起早兵役僞應之既至長沙紿之曰已到衡州矣大全出船眺望曰此長沙也不料汝等竟能令我至此吾休矣然亦罪所應得此必丁某之計何毒也

洪大全喜作詩詞就擒後於途間曾自題扇云寄身虎口運籌工恨賊徒不識英雄妄將金鎖綰飛鴻幾時生羽翼萬里御長風一事無成人漸老壯懷要問天公六韜三略總成空哥哥行不得淚灑杜鵑紅

賊見書箚恨如仇讎目爲妖書必殘毀而後快甲寅五

月二十一日未刻天暗欲雨有一賊於湖北漢口鎮花樓空地遺矢甫畢忽震雷擊斃之羣賊聚視見遺矢處有監本易經數頁上多污穢始知此賊以聖經拭穢故神怒隨之

賊遇大廟宇必焚燬以鄉民團練多假廟宇爲公所故銜之且恐官兵設伏於中也見土木偶目爲死妖必毀其象湖北漢陽門外有觀音閣範銅爲大士象高數丈壬子冬賊至焚閣欲毀象而無策乃以紅巾纏佛頭號於衆曰已拜上矣蓋賊以脅從爲拜上云及甲寅再陷



覓銅匠鋸之欲以鑄礮賊首在旁督視鋸甫及半象忽橫仆壓賊爲齏粉

見賊中僞示云有織營總制吳長崧等句結大兵欲破南京又有朱九妹私藏紅粉欲害楊秀清示諭衆賊勿生異心等語按織營皆機匠所充必爲南京機坊中人癸甲撫談雲朱九妹湖北人年二十歲有姿色楊秀清逼令入僞府暗以砒霜毒楊秀清未遂而死與僞示正合又賊在廣西時有周錫能者結官兵內應爲楊秀清所覺詭言天父下凡指出其事治以點天燈之刑之三

人者深明大義各據忠忱乃機事不密不能有成竝罹  
酷害惜哉

賊之諸隱語已詳邪說記矣偶見僞軍冊有下註三更  
者不知所謂嗣聞賊中逃出者云三更乃逃亡耳

洪秀全有婦八十八人第二賊婦賴氏生子初名天貴  
後加一福字爲天貴福九歲時配以四婦名幼王娘十  
六歲時秀全服毒死天貴襲僞號刻僞璽於名下橫列  
眞王二字人誤爲名呼以洪福璣實非福璣也江西擒  
獲時自供如此

雷侍郎攻揚州於徐凝門對河築礮隄日夜轟擊賊亦於城上開礮相拒一日賊礮裝藥待發甫安封門子我礮先開巨而恰塞礮口而入賊取子不得出僞總制親點門藥欲因以擊我不期礮子塞膛極緊火藥不得出豁然炸裂擊僞總制立斃羣賊驚爲神奇此後不敢復相拒

廣西賊婦廖四妹充僞女百長與悍賊楊起發私竝蓄財物因毒視女伴爲同館人所訐楊秀清派僞巡查周姓搜其臥處得男子履數雙藏金寶極夥時楊起發出

犯揚州傳僞令斬之梟廖四妹首以其髮繫長竿二賊  
昇之游城示衆至舊館門首女伴出視其首忽口目翕  
張旋轉如轆轤昇者披其頰遽止死猶爲厲亦取多用  
宏耶

直隸永平縣石壁口世襲雲騎尉宋廣心糾集義勇扼  
險禦賊持守頗久因衆寡不敵殉難迨賊距臨洛關記  
舊仇復往搜殺無一人從賊者又浙江諸暨縣民包立  
身集本村爲團遠近附之漸成勁旅浙東西江左右無  
不知包卹團練者又江皖濱江之金寶圍民團固結亦

屢遇賊氛均以乏接受害軍興後各省民團竭忠致命者極衆此三團爲尤著云

我兵圍攻金陵賊糧漸罄洪秀全於僞宮尋百草揉作團付諸僞王云天生甜露宮中食此已久令每一家呈送十擔收入倉中有呈送者亦有不從者見李秀成親書供詞

金陵廩生張炳元倡內應咸豐四年正月與大營約賊以正月七日爲元旦不設備乘間攻東門暗結守城僞官陳桂堂斬關相應至期陳桂堂於前一日調守七至

洲炳元復親至大營謁福將軍與與計引軍功田玉梅等九人潛入城約同志吳蔚堂金麗生宛姓等五十餘人分伏機匠及種菜各館議俟大兵至城下斬守門守礮諸賊開城以迎約期未定炳元往南門欲另說數人爲後路接應途遇陳桂堂之書使張沛澤知前謀執白僞侯黃玉崑酷刑鞫之備極慘毒炳元言沛澤吸食鴉片煙託買未給故挾讎相誣賊搜沛澤館果得煙具遂殺沛澤復提炳元至北逆章昌輝僞府炳元知不免因言身爲江南人非有老賊相誘何敢自通大營詢以何

人相誘故不肯白受一刑輒指一賊皆甘心從逆爲羽  
翼者羅織而死者數十未及同志一人田玉梅等均陸  
續遁歸大營炳元旋即遇害

秦淮利涉橋北有妓女王氏爲賊所逼佯作歡笑醉以  
酒抽刀殺賊而雉經於後樓逆氛所擾有膽識婦女殺  
賊者必多此一青樓之女能以計斃賊從容就義尤足  
嘉矣

鎮江失守時賈人周姓自城中逸出遇大隊賊至匿於  
積尸下馬蹶聲漸遠正欲起視復聞有呵殿而至者伏

不敢動俄有人曳其髮起見尊官著古衣冠熟視之曰  
此應死龍王廟前王三麻子手者釋之而去周知爲神  
懼甚乘夜急行欲避赴江北循江七八里得一漁舟亟  
登之有一家五六人先在舟以無川資舟子逐之涕泣  
哀求卒不允周憐之探懷中有十餘金盡以畀舟子時  
風浪正狂不得解纜遂臥舟中至次日風逾繁舟子強  
欲挂帆周素怯不敢渡躍身上岸此舟卽乘風而去瞬  
見達彼岸復大悔因念死已前定逕趨龍王廟前坐以  
待死日晡時賊大隊絡繹過皆未顧問尾一騎賊持長



矛直刺其喉周亟呼王三麻子騎馬賊抽矛詰以何處  
相識乃述神語賊云死妖何能知偏將釋汝周謂欲逃  
無資不如請死賊取一紙裹擲與之揚鞭逕去解視則  
黃金二十餘兩乃覓舟至仙女廟緬述始末揚州人皆  
知之夫賊侮慢神語故欲悖之孰知爲周姓一念之善  
所致耶

六合縣火神素著靈顯癸丑四月賊由揚州竄六合攻  
南關一賊試刀劈塑象之鼻以爲笑樂二更後官兵進  
攻忽賊兵十餘處火起延燒火藥燔死無算最奇者賊

尸通體焦爛獨長髮如故似畱此以別爲老賊者署知縣溫紹原稟經督撫具奏奉

御書匾額酬之

賊陷杭州入一大姓宅眷屬藏複壁中正欲搜劫忽空際沙土雨落賊駭退獲免此與宋建炎初倪氏女撒沙退敵事正相類積善家神佑之歟

咸豐四年秋七月金陵諸女館每夜若有神人示夢指途令歸女伴相告所夢悉同訝而誌之及閏七月賊驅婦女出城割稻女伴遵途而前恍如夢境乃悟神人之

語相率逃歸

浙江嘉興未失之前十日三更時城中大譁謂賊陷王江涇距城僅二十七里矣男婦扶攜至城下以待啓門出逃而城外寂然登城四瞻亦絕無烽燧約兩時許人始漸定互致詰詢則是時各家皆聞叩戶呼賊至王江涇者次日遂紛然遁徙追賊至城已空矣是夜之事謂賊伏奸細則賊蹤尙遠謂奸民造言則不能逐家叩戶或謂鬼神豫儆以速民遷避理或然歟

咸豐三年河南開封解圍後賊在古柏嘴渡口取黃河

船二隻滿裝火藥賊目十餘人押護問渡舟子爲兄弟  
二人私議謂賊勢之熾惟恃火藥乃至中流暗鑿二舟  
賊目俱溺斃火藥盡沈此二人亦滅頂而死草野之民  
舍身報

國以不知姓氏未荷

旌揚致足惜也

賊陷安慶時奪沿江船隻以備應用帆檣相屬十餘里  
有民人某姓言於僞燕王曰吾等之船皆任販運若概  
行封停則貨源不通皆坐困矣賊不能屈遂撥還之他

船援其說以免者凡數千艘其誦智有足稱者

安慶城北集賢關其山多煤有土猾某說賊開鑿以備  
鑄鍊軍器之用逼脅居民往役勞瘁莫堪土人某言於  
賊曰昔嘉慶間此地曾因事開鑿有善青烏術者言於  
巡撫曰皖城因山設險萬山環抱狀若九龍奔江開鑿  
偶誤恐傷地脉故止而不開今若蹈其故轍恐於形勢  
不利也賊不聽及掘至山洞見有舊鑿之迹方知土人  
之言不誣

浙江湖州孝廉吳熊任湖南綏甯縣咸豐十年庚申九

月殉難少年時曾祈夢於于忠肅祠見小室墜壁作書  
云散絲絡女爪黃金冠獼猴莫恃合著口終防白了頭  
初不解嘗爲戚友述之及難後始悟首句指綬字次句  
指庚申三句謂營弁哈某迎戰敗績末句則賊皆裹白  
巾也事之前定如此

鄒巡撫鳴鶴未遇時夢至一衙署有友人自內出云在  
署掌冊籍因叩以終身友付八字曰官居四品洪水爲  
災道光丁丑年守河南開封府中牟決口黃水灌城危  
在頃刻因舉前夢告人自恐不免乃竟無恙後擢任廣

西巡撫罷官回籍爲兩江陸總督調赴金陵籌防城陷  
殉難蒙照道員例

賜卹始知四品之應洪水蓋指洪逆也

同治元年賊陷浙江湖州府之菱湖鎮有烏程縣貢生  
沈玉茗年七十餘家居東柵當賊來路獨遮與理論曳  
之不退刺刺不休賊厭而戕之夫逆蹤徧天下所戕害  
者不可以數計獨沈生邀與言理其愚真不可及已

賊據鎮江時金山有蛇長約數十丈窟其中屢出傷人  
一日垂首飲於江其巨如鼉尾仍在洞中賊乘其首尾

不能相顧攢擊而屠之分於各館人各得二寸餘

鎮江九華山多狼賊常捕之其法掘地爲坎用生鷄半日不與食置鷄於坎中以厚板蓋其上中穴一洞引狼至坎側鵝不得食引頸向上狼來食鵝頭入洞中不得出遂捕之歸

有自賊中逸出者云被脅入風琴衙詰其物則卽西洋之八音匣蓋賊目未睹寶貴之設專衙焉又賊見鐘表不知作何用疑輪廓絲飾者爲真金鑿而藏之其陋劣至此



楊文軒以字稱逸其名湖北省人家城內以千總充常  
巡撫巡捕官省城陷引巡撫至其家從容請盡節代挽  
帶縊之中梁俟氣絕掩藏畢再痛哭拜亦自經常巡撫  
之殉難固無俟文軒請而文軒以微弁能如此就義可  
以風矣

咸豐四年三月江西九江府沿江一帶徹夜火光不絕  
隱隱有人馬行走之聲疑爲大兵過境巡兵迫而視之  
但見燐火居民擊銅鉦喧逐始漸散

同治三年六月初旬浙江曾巡撫國荃畱辦金陵軍務

率兵勇肉薄攻城值酷暑烈日如火城賊屢以藥桶擲下幾爲延燒會巡撫望空跽禱

關聖大帝速降雨澤以伐賊謀十一二日各得大雨一次而數里外皆清明十六日地道告成酷熱尤甚曾巡撫如前默禱並許奏請

欽頒金陵及原籍湖南湘鄉縣

關帝廟匾額午時火發之後有陰雲自鍾山覆冒而來涼風習習擁護兵勇登城得以竟此全功按兵興後各省武功屢邀

神靈佑助常有異徵此次

聖德感孚

神祇効順誠理有固然者

瑣事應記可記者極多一人見聞不廣僅錄二十  
五則俟四方採訪寄示再爲續編